

Charla riba nos descendencia na Sta. Cruz

ORANJESTAD(AAN)-- Segun archeologonan e restonan humano mas bieu cu a wordo saca foi profundidad di tera tabata un hende muhe. Y nan a dune e number di 'Eva'. T'e cu awe 'Eva' ta wordo considera como e antecesor di henter humanidad. Esey no ta kita cu den futuro por bay descubri un otro skel-eto cu lo resulta di ta mas bieu cu 'Eva'.

Historia verbal ta conta loke ta wordo traspasa di boca pa boca. Escritura sa trece hechonan documenta.

Asina e historiador Hurlandes Johan Hartog ta confirma den su buki Aruba zoals het was, zoals het werd cu e pueblo Arubiano ya foi aña 1795 a keda forma entre e habitante original Indjan y e colonizador Europeo.

Otro prueba ta cu documentonan di Iglesia Protestant na aña 1843 ta indica cu nan iglesia tabata consisti di 411 miembro di cual 108 tabata Europeo y 303 Mestiso (mezcla di Indjan cu e Europeo).

Considerando e hecho cu den e epoca ey e habitantenan di e isla tabata considerablemente Catolico, ta un indicacion cu mester por tabata tin mucho mas Mestiso bibando na Aruba.

Den curso di tempo storianan por bay ta cambiando, pero testnan di laboratorio semper ta determinante. Testnan di sanger ta identifica enfermedadnan. Pero pa yega na e identidad di un persona ta requeri testnan di DNA y mitochondrial.

E resultado ta indica exactamente kiko ta bo marcanan di herencia y kiko ta bo descendencia geografico. Pa medio di un material cu ta wordo yama 'genes' caracteristica-nan ta wordo traspasa di un generacion pa otro.

Conhuntamente cu un instituto renombra na Caracas (Instituto Venezolano de Investigaciones Cientificas: IVIC) y Universidad de Puerto Rico, nos investigador di poblacion-genetico dr. Oswald Raymond Wever a studia e estructura di nos poblacion foi aña 2000 t'e cu 2011. E meta princi-

pal di dr. Wever tabata pa yega na e origen etnico/geografico di e poblacion Arubiano. Pa yega na e 'Most Recent Common Ancestor' (MRCA) o sea e antepasado mas recien y comun, estudio genetico ta prescribi cu mester hasi uso di 'fam' pa comproba cu e origen geografico di un pueblo ta bay'back t'e pa tanto generacion.

Pa tal motivo mester a forma un lista di fam cu a cubri tanto e epoca di Colonisacion como esun di Sclavitud.

Esaki a bira e base di e investigacion di e estructura genetico di e poblacion Arubiano.

Pa siglonan largo historiadornan a pretende cu e poblacion di Aruba tin dos origen: Europeo y Africano. E investigacion mitochondrial DNA cu dr. Wever a realisa a bin trece'na'cla cu e di tres origen di e poblacion Arubiano 'Indjan o Amerindio' nunca a keda exterminada. Na aña 2011 dr. Wever a constata cu a pesar di e mezcla, e poblacion Arubiano tabata consisti ainda di 53.3 % di e haplogrupo D locual ta coresponde cu

e grupo etnico : Indjan o Amerindio. MRCA ta indica: un periodo di miles di aña. Pa haplogrupo D esey ta nifica: 34.000 aña. Kier meen cu haplogrupo D, e Indjan o Amerindio ta existi sigur ya pa 34.000 aña. Y pa medio di e mama, pa generacionnan cu ta bin, e marcanan di herencia - den e caso especifico aki - 'haplogrupo D' lo sigi wordo traspasa directamente pa tur yiu: tanto homber como muhe.

E 'Charla di dokter Oswald Wever' na Club Don Bosco Noord tabata sumamente satisfactorio. Fundacion Herencia Historico di Aruba (FHHA) cu sosten di UNOCA ta continua cu su serie di 'Charla riba nos desendencia' riba dia-domingo 14 juni proximo foi 10:00 'or di mainta t'e cu 12:00 'or di merdia na



Centro Curason Sta. Cruz (ex-Credit Union). E charla ta bay wordo hiba den idioma Papiamentu. Entrada ta gratis. Durante e mainta aki lo tin pasa'boca crioyo di Aruba. Un boca

bisa otro. Bin scucha kiko ta e descendencia di Aruba su poblacion.

"Esun cu no busca su raiz, lo no sa su destino" (proverbio di e tribu Indjan Navajo)